

«Nous vagn sustignia gugent chel project»

Coira/Honduras: Sustign digl «Kiwani» club pigl project da Patricia Scarpatetti

DA GION NUTEGN STGIER / ANR

■ **Solidarità generosa digl club tgi sustignia projects caritativs per unfants. L'emda passada ò la manadra digl project «Yo quiero ser...» Patricia Scarpatetti retschet ena donaziun da 10 000 francs per en ulterior project a Honduras. Per chel project èn er blers da nossa regiun sa mussos generous. Igl è prest diesch onns tgi Patricia Scarpatetti da Cunter s'angascha cun corp ed olma e betg igl davos er cun blera amour per ena tgesa d'unfants a San Pedro Sula a Honduras. Ena tera tgi sa catta all'America centrala e tgi totga or dalla vista sociala tar egna dallas pi povras teras digl mond. Fatg las ampremas cun-schientschas cun la povradad a Honduras ò Patricia Scarpatetti cura tgi ella è eida sur mar per dar scola. Scu voluntaria ò ella luvro ainten ena tgesa d'unfants svizra ed igl 2007 ò ella fatg or dad en spital vigl, tgi niva betg ple d'uvro, ena tgesa d'unfants e do a chella igl nom «Yo quiero ser...». Sustignia è chel project nia anfignen igl 2010 da diversas instituziuns caritativas e siva da bung treis onns segna ena fundaziun pigl sustign dalla tgesa d'unfants a San Pedro Sula. Da preschaint gioldan 32 unfants dad en onn anfignen 13 onns la buna tgira da Patricia Scarpatetti è sies collaboratours. Siva digl otgover 2012 ò la fundaziun savia cumprar graztga alla generosidad da bleras persungas privatas, affars ed instituziuns da nossa regiun en ulterior biets tgi sa catta aint igl manevl dalla tgesa d'unfants existenta.**

Dalunga stos prontos da sustignier chel project

A Honduras, dantant er an Svizra, aint igl Grischun e cunzont er an nossa regiun è l'acceptanza pigl project «Yo quiero



Patricia Scarpatetti, la manadra dalla tgesa d'unfants.

ser...» da Patricia Scarpatetti s'augmentada ferm. Santia da chel project veva er Christoph Suenderhauf, da preschaint president digl cunsegl d'administraziun da Lai Pencilularas SA e commember digl «Kiwani» club Coira. Chel club è egn da 200 tgi dat an Svizra ed ò igl mument 60 commembers. Parsoura digl club tgi sustignia adegna puspe cunzont an noss cantun projects caritativs per unfants è Thomas Grünenfelder tgi stat a Domat. Antras Christoph Suenderhauf, tgi ò gio divers onns en bung contact cun Patricia Scarpatetti, èn igls commembers nias fatgs attents digl nov project a San Pedro Sula. Dus gedas ò Patricia Scarpatetti er savia preschentar sies project tar en schinummo «meeting» digl club. «Igl commembers èn dalunga stos prontos da

sustignier chel project uschia tgi vagn cun plascheir savia surdar a Patricia Scarpatetti 10 000 francs», dei Thomas Grünenfelder. Igl president digl «Kiwani» da Coira dei er tgi tar ella seian igls daners an bungs mangs, chegl tgi seia er sto decisiv per chella donaziun. Igl ple sustignia igl club projects caritativs per unfants aint igl Grischun e darar projects agl exteriour. Cun esser la manadra dalla tgesa d'unfants «Yo quiero ser...» digl Grischun ins vegia sustignia fitg gugent chel project a Honduras, ò accentuo Thomas Grünenfelder. Igl impuls per sustignier finanziarmaintg la compra da chel object seia scu gio menziuno nia da Christoph Suenderhauf tgi vegia er sa mess aint fitg cura tgi seia sto da rimnar igls daners. El veva gio s'angascha avant

treis onns ferm tgi igl retgav da 30 000 francs dallas gondlas viglias da Lai Pencilularas SA è ia an favour digl project da Patricia Scarpatetti.

Adegna puspe sustign dall'atgna regiun

Patricia Scarpatetti tgi sgola chels deis puspe a Honduras ò naturalmaintg gia grond plascheir da retschever chella gronda somma. «Ja sung fitg ventirevla tgi nosa fundaziun ò savia cumprar chel biets tgi sa catta gist dasper la tgesa d'unfants existenta», dei la donna da Cunter. A disposiziun star ossa chella tgesa a set mats tgi on schiglio nign datgesa. La fundaziun vegia lia nizigier chella occasiun da cumprar chel object tgi vegia alla fegn tuttegna custo 80 000 francs. Graztga allas dona-

ziuns generousas da bleras persungas da Surmeir, da blers affars e dad organisaziuns dall'atgna regiun seia sto pussebel da far chella investiziun, dei Patricia Scarpatetti tot cuntainta. Ella ò an spezial menziuno Peter Odermatt, barneir, igl magnafatschenta dalla «Bergsenn AG», tgi vegia sustignia chella compra ed er schiglio adegna sa musso fitg generous vers sies project. Plascheir vegia ella er gia tgi Origen vegia graztga all'occurrenza da benefeci rimno 7000 francs per la compra da chel biets. Ansomma catta Patricia Scarpatetti angal bungs plets er per chellas persungas tgi on pussibilito chella compra cun ena somma pi pitschna u pi gronda e schizont er regalo mobiglia ed anc bler oter per indirizzar l'ulterioura tgesa d'unfants a San Pedro Sula.



Profitar dalla nova tgesa d'unfants pon cunzont mattatschs tgi on ossa en nov datgesa.

FOTOS MAD

Lavour avant 50 onns, oz e dumang...

Barvogn: 3. baterlada cun dus electricists: Alfons Venzin ed Aurelio Capeder

■ **(pb) La terza e davosa «Baterlada» agl rom digl Parc Ela è stada deditgeida alla forza idraulica. La moderatoura Melanie Salis ò gia scu visavis egn dalla garda viglia, Alfons Venzin (61) ed egn tgi è nia da nov professionalmaintg ainten la regiun, Aurelio Capeder (41) da Casti. Aurelio Capeder è vendader dad energieia aint igl Grischun, vot deir el è chel tgi ò la relaziun directa tar igls cumegns e tar chels tgi fon adiever dalla forza electrica. A Turitg è el ia per far en curs ed è sto pandia, el gudagneva gist 1000 francs duple tgi a cò.**

La tecnica è sa midada enorm igls davos onns antras la digitalisaziun ed ins ò savia concentrar igl sarvetsch da survigilaziun e regulaziun.

Alfons Venzin ò gia emprendia da toler e leva sa far independent. El ò gia occasiun dad eir tar igl ewz scu survigilader digl meir da farmada e leva turnar segl mastier, ma è sto er el pandia ed è anc oz segl madem post. Tge habilitads dovra el? Esser fido, aveir tscherzas habilitads technicas, luvrar independent e far exactmaintg misiraziuns.

Igl rampar – en stabilimaint complex

Alfons Venzin ò decalro la situaziun per l'erecziun digl meir da farmada. En meir da beton niva betg an dumonda perveia dalla colina agl vest cun material betg stabil tgi lascheva eir tras l'ava. Biagia da 1950–54 e chegl ins ò stuaia far en rampar cun amplaneir se material.

Per Alfons Venzin dattigl er ena scena-ria an cass dad alarm. El stò far tenor manual en pass siva l'oter.

Per Aurelio Capeder è alarm cura tgi

la comunicaziun è interrotta. Alarm dattigl er cura tgi igls apparats mossan er p. ex. movimaints pi gronds tar igls meirs da farmada. Notgs sainza pòss ò el mai gia, essend tgi igl sistem da siertad è fitg franc e plurifunziunal.

Alfons Venzin è er activ cura tgi vign fatg las diversas revisiuns e paregia er chellas e varda er per la siertad.

Igl survigilader digl rampar ò er rachinto ena istorgia tgi gl'era do prieveil tgi plattas da crap nivan oragiu. El ò stuaia decider a curta vista tge far ed ò laschea neir igl helicopter per sagliantar. Igl helicopter è sto quasi en antier de. Glè gar-

tagea ed el vegia mai survagnia ena ramproscha, er schi seia sto tger. Piglier sez decisiuns!

Igl taimp è sa mido

Aurelio è rivo giu Turitg tgi la scena da drogas era segl Platzspitz ed agl Letten. El ò savia perseguir las tgossas ed ò via diglto. Ins vegia sa diso vedlonder e la lavour ins niva da far tuttegna, gl'era per part separo cun seivs. Aurelio Capeder veva fotografo en po per mussar a tgesa scu tgi chegl geia tiers. Ins veva via chegl ed el ò tgappo freidas.

Alfons Venzin ò rectificgia en tant rap-

ports ainten las medias ed agl internet sur dallas culas da laresch da Segl an Nagiedegna: chellas dettigl er a Marmorera, belas!

Tots dus von a tgatscha. Aurelio perfign sen posts tgi Alfons geva avant. Alfons Venzin ò atgnamaintg bagn en substitut, è pero adegna segl post, schi vign critic. Er da tgatscha.

Noua giarogl cuagl ewz anavant cun l'energieia? Las concessiuns per las ovras idraulicas vignan renovadas ed igl ewz ò an senn da far chegl. Vetiers vign er adegna duple energieia solara scu er cuagl vent. Igl cliaint ò er gio oz la pussebladad

da cumprar energieia regenerabla ed ecologica. La clientella vot oz per part energieia sobra per quietar la cunscienzta.

Alfons Venzin vign betg ple liber digl sies partenari da veta: igl meir da farmada. Veva el panso. El lavoura anfignen 75. Ossa ò el mido igl pansar e less sa la-scher pensiunar schi spert pussebel e galdeir anc en pèr onns.

Dumondas or digl meiz

Anc avant en po dad onns eran 30–40 plazz da lavour repartias sen Marmorera, Tinizong, Casti. Oz èn tots inscrets a Seglias. Pertge? Gl'è do ena reducziun digl persunal sen fundamaint dad ena automatisaziun e tecnisaziun dallas ovras. Tot las ovras vevan gliout ed ins luvrava an squadras. Aurelio Capeder ò managea tar chella dumonda tgi avant 20 onns luvrava 800 persungas tgi ewz a Turitg sez, oz seian chegl 1200. Er agl Grischun central seian oz betg pi pacs, angal plazzos oter. Igl ewz investescha ca. 100 miu. ad onn. Per exaimpel vign ossa fatg revisiuns a Marmorera e Tinizong per passa 60 miu. Anfignen 2014 vignan blers indrezs tgi èn per part anc dall'antschatta ramplazzos u remess antras instrumaints pi moderns. Er cò vign mido digl taimp mechanic tar igl taimp digital.

Uschia ò la moderatoura, Melanie Salis termino la davosa «Baterlada» agl rom dalla retscha da discurs digl Parc Ela 2013. Las treis ediziuns on do mingamai ena buna invista ainten igls camps spezifics turissem, agricultura e forza idraulica tgi èn ena impurtanta part economica dalla regiun digl Parc Ela.



La davosa ediziun dalla «Baterlada» digl Parc Ela aint igl resorant Arlos a Savognin ò la moderatoura Melanie Salis mano cun igl survigilader digl meir da farmada digl ewz a Marmorera, Alfons Venzin e cun igl responsabel per la vendita Grischun central digl ewz a Seglias, Aurelio Capeder.

PDS